

林初文詩文全集

林初文詩文全集

序

楊復所先生會語序

余讀楊復所先生與高別駕諸君所謂會語
語不數條條條解中條不數語語語譚虎蓋
玄通之歎論豈荅問之危言哉余喜其說竊

爲次之蓋道生之道葆命之詮也藏恕之藏
陶世之型也成己之成運化之胎也此三言
者昭矣備矣旨乎美矣若其舉明德則建大
學之的述天命則探上道之蘊訓時習則畔
君子之疇稱可欲則洩至物之機論盡心則
貫天人之緒示孝弟則懸聖凡之鏡此六言
者高矣深矣易乎簡矣濛濛鴻鴻不可殫矣
至其尋本窮源提綱揭領廼以慎獨表夫致

知則是破人鬼之關導神聖之路補十傳之
闕開千載之蒙者也夫哉先生與道親矣揆
厥所由其在茲乎蓋嘗論之此道之來非一
世矣流行自天幹旋由人是故義勲啓其秘
姬孔發其光漢儒掇其拳宋人漑其實雖其
隆污異代純駁殊科要之厥脉如綫賴以引
之矣其在我明則薛蔡樹前王羅翼後陳湛
二氏並挺嶺表二百餘年稱者有數雖涉川

之殊派亦登岸之同途也先生生嶺南余嘗
披其文斷斷綽綽抽精之辭也睹其貌哲哲
黜黜蓄美之器也蓋山川之所產亦師友之
有鄰豈聰明之獨稟抑問學之相成哉夫含
靈匿曜者觸景見理茹粹飲醇者吐辭成經
散川上之觀尼父會其趣暮春之樂曾點得
其情大哉先生斯語歸然矣

純卿兄詩序

夫意有所致而言出焉致約言約致奢言奢
致至言至致反言反此四致者天竅之靈聲
皇辭之初命也故風不歌於無懷之鄉騷不
陳於關雎之亂何也元世之民無意無言仲
世之民有言無制至於晚近世則制之而言
矣故古風制晉魏近體制唐律制杜絕制李
歌行長短制駱白諸家此五制者軌行秉真
之夫所繩睨以擗皆硃宥不羣悲愁無聊之

士所鵠決以吐氣者也故吾先世子羽公始
以士窮制言今伯氏純卿以仕窮言而繼其
制蓋玄解得之穎識藻語出之逸情豪氣發
之壯遊慨聲生之別感淪淪乎浸近諸君子
哉夫蕡土變而金石鳴葭黍具而律呂鈞物
極則飾度章則立此至數也四致不明五制
乃興所貴者通孰能去之故言而不言通半
制者也制而不制通乎言者也於戲伯氏之

詩蓋制之之旨矣

答情詩序

夫意之所會則魚水動於精神分之所乖則
雲泥懸於枕席故雪梅之判所以報璫而風
竹有懷終乎拋玉白頭之恩何寡紅顏之怨
自多命也不由言之何益然盈盈旣病迺寄
曲於春陽盼盼未亡亦興吟於秋月鳥飛猶
顧石激則鳴此靈蠢之齊歸而情形之極變

也况君有鳴珂之訪妾有送香之迎旣兩懽
以如期胡一別而成棄論扳倚則青雲非高
問晤言則黃泉猶近是用略其卑鄙布其悃
誠雖妍醜之殊觀有慚蕙錦顧悲歡其同感
或擬濤箋嗟夫我生不辰豈恨王郎負桂君
緣有日尚思韋氏逢蕭迴此寸腸宣之九韻

題李文里黃白鏡序

余旣三脫死乃知塵劫之數而不怪神仙之

說何也事有必至理有固然神仙之說不可
怪也夫人不怪其所可怪而反怪其所不可
怪是故語之神仙不笑則詈夫天地之上下
日月之更代風雲之變幻山川之流峙草木
禽獸之生發寒暑晝夜之推遷千態萬狀恍
恍惚惚窮之莫得其端揣之莫得其倪此非
天下之至怪者耶而人不之怪者習於聽聞
之常也然尤有甚焉人生而聰明機巧無所

不至此天地間之至怪者也而人尤不之怪
獨語之神仙則羣然以爲異此非人情之淺
而知理之難耶不知至怪莫如人至不怪莫
如神仙何也人卽仙仙卽人也是故仙仙非
仙亦仙生仙死亦仙已仙仙未仙亦仙人仙
我亦仙余初見文里髮斑白顏如渥丹心竊
異之以爲此姑射山中也旣而與之語不
數言余益心異之以爲此廣成子告軒轅意

也因讀其所著黃白鏡仙之事也繹其文仙
之理也事至易而無難理雖隱而寔顯人不
之知而自爲怪不知天地日月風雲山川草
木禽獸寒暑晝夜皆安其常而上下代更流
峙變幻生發推遷亦行其妙神仙因之文里
鏡之世人怪之不得已而著黃白鏡予欲破
其怪而爲黃白鏡序序以破夫怪怪破而文
里之鏡明鏡明而神仙之說平

鳴鴻記序

余與仲豫旣會金陵十六年間一見九別日
居月諸忽忽如夢人生世上豈不悲哉己丑
之春余坐黨禍抱疏闕下逡巡五年中遭凶
荒遠棄妻子二十餘口淹在異鄉室如懸磬
門可張羅念我友生悲如之何頃以東夷逼
我外蕃願出義師以敵國愾終軍旣請長卿
未薦崎嶇萬里奉檄南還憂憤內結寒暑相

逆骨髓之痛溝壑之疾窮鱗不澤鍛羽無枝
嗟夫傷已亦可悲也鄉者仲豫馳書相弔自
淮至燕三千餘里召我來歸置我妻孥惟我
之故忘其破家旣余道病止以一室朝問夕
慰百有餘日給以藥餌佐以饘粥犬馬區區
白骨生肉嗟夫居者四壁立行者一裘敝非
有富貴交孰存死生際由此睹之余未易爲
郭仲翔仲豫何難爲吳永固哉伐木不歌谷

風乃嘆鳴鴻之記可以觀已屈子之詞周郎
之曲千載之後此道不辱見者不汗流聽者
不泣下哀哀今之人吾不知之也

玉麟記序

道有九軌隱非一門旣託意以沈浮何校形
於清濁是故留侯仙邈曼倩吏諧磨勒奴潛
聶娘婢奮此皆殊蹟不可方求異哉王生優
孟之流觀其玉麟之詞雅有黃鐘之調按抑

揚可叅史傳懷慷慨足弔英雄是漢室異代
之忠臣而劉郎曠世之知己也非有得於呻
吟何以發之喟嘆異哉王生優耶儒耶彼其
飾文章爲脂粉假道義爲機關面目糊塗瓜
園之鬼非怪骨肉冰炭李家之兒未凶豈知
冠蓋是行頭朋僚卽戲脚酒闌歌罷終爲散
席之人漏盡鐘鳴都作下場之客不如陸沈
湖海放浪形骸日據邯鄲之枕夜登傀儡之

臺付離合悲歡於何有齊窮通得喪於儻來
從稚子之爭詫任矮人之自哀詩云優哉游
哉聊以卒歲異哉王生雖隱不晦

青虬記序

作青虬記不知何人然而讀其辭至令人泣
下豈古所謂鄒陽江文通流耶夫二子皆以
獄中上書而梁與建德二王皆爲動念出之
其書猶在也以此斯記其辭旨太略相似然

以之風世則奢彼而取此矣

灤陽城宴別序

咸大將軍席上送汪伯耳奉使還吳錢汝元省

親歸
越

注長公腹藏百萬甲兵投筆入盧龍之塞錢
仲子手運三千禮樂擔簦過涿鹿之鄉四海
萍踪越鳥吳雲自適一言蘭臭燕風朔月相
宜愧一介學異懷蛟未賣黃金之賦幸二君
情均得兔遂承白璧之盟秦繡永而賞知音

占聚星而忻促膝夜雪開尊臨北極覺漢渚
之非遙春花擁棹泛東湖望瀛洲其何遠有
懷天地偶此同襟不謂風塵忽嘗分袂皇華
歌而使君出芳草賦而王孫歸或言省親闡
劔指臥龍之嶺或載勤王事旌飛盡馬之峯
鴻雁分行驪駒在道於時梧秋已凋桂月初
圓雲帶露而愁凝樹含霜而驚落孤城寒角
起封疆動壯士之思萬戶暮砧鳴歲序繫遠

入之感有情斯觸無物不懷山憐斷而迴岫
西關水悵流而停波南浦顧芙蓉之不媚乃
倚檻以如顰彼蟋蟀其何悲亦吟堦而似嘆
車脂弗駕輾轉於河梁馬秣猶維嘶徘徊
於岐路於是瞰金城以開帳坐召虎於三屯
挹銀漢以流觴醉元龍於百尺胡姬掩扇清
歌落八月之梅趙女拂衣妙舞鬪三春之柳
玉山筵上倒氣翻牛渚之濤寶劒斗邊橫光

動龍沙之微振衣而爽籟發秋聲客思同清
舒嘯而驚鴻回物態人情俱警連床而話不
雨何淒擊筑以歌因風益慷十年壯膽照青
燈以燭明千古愁顏染綠醪而盡破今宵疑
對影恍如蝴蝶枕邊飛明日問行踪多是鳳
皇山下宿喜故人之共發折楊柳莫唱渭城
之詞況新事之相將聽琵琶豈下江州之淚
若夫努力前修爭一鞭於先着論心後會念

雨蓋之初傾或破浪乘風揜圖麟而紀績或
攀鱗附翼望題雁以蜚聲擬結綬於青春看
聯鑣於紫陌是所願也可不云乎嗟夫江南
花鳥久無主人塞北風霜尚多遊子君俱去
我獨留臨水登山誰識送歸之意當歌對酒
翻成惜別之期皎月出而窺筵無亦眷余之
孤影寒花開而侍榻願言贈予以清芬酒盡

杯詩成四韻

沈開府之任閩中序

題金陵贈別圖代送

晉謝公起官因江左之雅望周樊侯出祖動
山東之永懷蓋大臣身繫重輕則鎬方有六
月之咏而故人情關離合則渭城有三疊之
歌況我中丞公學貫天人名傾朝野五百年
夏隣商佐叶龍虎之昌期二十載越水吳山
抱煙霞之佳致爾其東甌明而鯨波播於湯
谷南門暗而狼火接於黎峯非尚父之鷹揚

六弋誰識雖武侯之龍臥三顧何辭是以上
恩奮而束纁下雖能而結綬九重丹詔有心
發彩鳳銜來一片白雲無意向青山飛出一
拜而丞三輔再拜而帥八閩揚麾開漢帝之
關不羨營屯細柳建節臨越王之島應看弓
挂扶桑於時月會中春日回上苑金城外三
山二水天列丹青玉帳前百草千花地鋪錦
繡嚶嚶黃鳥若懷我以好音渺渺綠波侶送

君之行色某等或忝弟兄有壘麓同堂之好
或叨左右有舟楫共川之情誦采芑之章感
四騏之旣駕聽折柳之曲悵一杯之未傾是
以掇璫芳張瑤席陳蘭籍捧桂漿倚題鳳之
臺綴離情於月露假圖麟之筆染別意於煙
雲劒舞一行南斗吐虹霓之影饒歌三闕東
風喧梅柳之聲儼戎服之登舟李膺非遠慨
中流之擊枻祖逖何遙豈曰大夫乃登高而

作賦言念君子聊釃酒以臨江

潛山送支學博序

支先生中都秀士上國醇儒蚤歲下帷窺六
經之玄圃當場擲管鼓九流之雄波孝友稱
於家庭周臣張仲之選忠信行於州里漢人
陳寔之遺協我同寅入室紛芝蘭之臭譽彼
多士出門爛桃李之華裁泮沼之租澤宕化
龍之地啓文峰之塔氣揚題雁之天一代師

模凌霍山而高聳千年友誼泝潛水以齊長
名起嶽南振鐸過錢塘之境望懸斗北扳轅
遮皖伯之途敬致餞於臨岐顧贈言於別路
於時景當六月柘火已飛序迫三秋梧飈欲
動汀草遙而馬蹄不駐川濤漲而鷁首難維
聽葉底之鳴蟬宛爾同聲之調睹雲間之舉
鵠淒其分翥之情祖帳臨池采芳芹而薦酒
官亭對樹賦修竹以陳歌紅日影團團曉映

盤中苜蓿青霜花皎皎寒生匣裏芙蓉念我
友朋頓隔江湖之夢顧茲弟子寧忘洙泗之
懷折柳叙其殷勤班荆增其惆悵一杯須盡
更爲汾上之行四韻俱成聊作河陽之別

贈張洪野經司序

今戎衛之有經司非古所謂叅軍者耶夫叅
猶叅之也經則經之矣今制視古意爲隆隆
其任則難其人何也佐軍以從帥稽武以蕃

王豈淺事哉張君洪野寔叅武德衛軍事叅
未幾而侍御謝公獎之獎未幾而胡公又獎
之獎之云者所以勸能也二公之言不虛美
不倖得君胡能而得此耶夫國之司命在三
軍三軍之司命在衣與食彼挾纊之氣奮於
撫巡脫巾之呼涵於待哺其所出於感激者
殊也今法衛士之糧以月給寒戍之布以時
頒往往以經司行之然軍人以沾被不均生

怨長吏以乾沒無忌起羞亦往往以不良經
司致之非贊畫之才疎則廉潔之守壞故也
君嘗受命頒諸軍士布覈籍處分貨好數足
令軍中晏然稱平而卽以獲胡公獎則其才
其守槩可知矣君其所謂參軍者耶夫峩山
渭水之秀聞於天下君族在涇陽世爲甲第
而君學博士業於諸髦中尤最稱良今其在
此位也非其數之奇也耶然敦書說禮以翼

軍謀竟其所志不狃于位其過人遠矣故余
以前獎見君於周也以後獎信君於曲也君
其所謂參軍者哉君之父古崖公曾爲君今
官有能聲君爲今官未數月卽以異典重贈
其父及其大父是君之能補於國而亢其宗
也如此今世明白官不踰德君年且壯志愈
益堅嘻君豈第止所謂參軍者哉余以君爲
足賀矣庸是叙之

送余君之雲霄驛宰序

今夫立遽以傳命也所以開宵旰之情宣閭閻之鬱告緩急之故壹遠邇之懷疾若決機順若轉丸教令以流化脉斯浹豈不亦要哉要於勞使者治過賓崇卑有差往來有秩道路無壅官旅莫虞等威旣辨體統益尊斯亦休休乎理矣循之寢久遂反其初覩傳舍於私室掠公典以市恩一意奉承無復規制故

官罷於奔走民悴於供輸吏厭於誅求卒痛
於箠楚此近亂之道也今議憤之一切裁罷
卽公卿之貴會同之盛非被朝命母得乘遽
薦紳雜之塗人館垣虛若廢第矯之雖過懲
之實深故奉使之外無賓奔命之外無役其
任甚簡其職易修况雲霄在閩漳之僻壤皇
華之旌月無一至津道之駕歲不再經君往
爲之雖執爵對客展卷自娛爲儀封人之隱

漆園吏之傲固無不可又何難哉且以君之才浮於其位則邑有關屬當兼司之鄉有獄人當分聽之其志得行其聲將起此位雖下豈能長淹哉故館人之宰君之餘也雲霄之地君之適也君姑行乎夫君於余融爲著姓棄博士業乃就今官其先大父以叅軍褒其累世其父亦爲君今官致而歸有禮也哉故余嘉其後人而言以贈之

贈浦江尉郭君序

夫官之吝德也人各以其說爲之也上者謂
莫禁下者謂無益能者謂何苦不能者謂不
害上下相象因依成疾公不奪私理不蔽亂
政無所紀民失其歸故四說行而百官邪矣
夫上可以轉下下亦可以轉上轉於上者其
機以畏轉於下者其機以愧皇王之世官序
治隆令聞不廢斤斤乎是循何術哉廉恥盛

法度章上愧而下畏故也時逮叔季則勤於
刑令薄於羞惡轉化之機將專在下矣豈可
忽哉夫尉官最下而於民最近近則情志通
下則求責煩此其位在難易之間耳令人人
知畏而各毀其說則工績乃舉聲名以流睹
聽所至豈無怨慕故尉可以媿簿簿可以媿
丞丞第以上官愈益尊而媿愈益重媿故憤
憤故奮人人奮而官成矣豈不大有補於世

理哉然而下之人寔難焉夫藝達之士抑伏
卑小往往有之顧行顯者爵不加功多者罰
或重此其故何耶故天下之人宜有說也今
茲之日上下明白矣郭君之行也姑持畏以
往乎

送許提舉粵西序

昔管子作內政寄軍令鑄山煮海算無遺策
故能以齊富強此伯國之烈哉然大較觀之

治軍理財其事並重而其術可相推矣君
興武軍九年而官不易方師旅無曠又
其餘智奉使淮揚間詰鹽皆章章有績故得
被此寵命司運西粵華哉何非常乎則爲其
才通也夫國家有錢鐵茶鹽諸賦皆帑計所
並需也而鹽利爲大食鹽之鄉攻利者奔走
焉官食者什之三私食者什之七私則爭爭
則亂而茺蒲之藪有足憂矣故諸賦皆可理

也而榷鹽爲難粵之東西同耗而異息西人
食鹽悉取諸東而寔以諸徭黥處易於生心
故榷鹽難也而粵西爲甚君茲以明智之識
往而試之當無遊刃地矣然而何以能此哉
君姓著於吾融爲世家已獨以數奇中謝傳
士業治法律而要未嘗廢詩書也故自起掾
曹至入仕以來所與文人學士游翩翩如其
始操觚日而當路上卿所爲雅重之者固知

其才操卓卓咸有所自來也已夫世之所貴
於世者三利國則貴顯親則貴列於士之林
則貴君之尊大人爲定陶尉以君叅軍功同
其太孺人承封誥如君官君復挾所重於諸
薦紳先生而志以益達親之訓以益章蓋一
官而三物成矣豈不貴哉且今官寔司一夫
政則所謂握其奇贏明其公私導其正賦一
切便宜事悉得而舉之矣世方需才不惜爵

實光君生平榮蹟何可旣乎君行矣尚益厲
哉余喜國家不虛此一殊典故以告乎刑名
之士令知所以貴君且無所以入途自表畫
也

賀譚叅軍序

夫索裊於樞不失其神卜倭於巷乃得其情
是故六行之門貞夫之所出也兩名之途通
士之所立也君以蚤孤崎嶇成人奉其大母

如母慕其前母如母篤其異母兄如同母太
節章章槩可睹已至其輕施予重然諾周結
納曠游覽沛乎標致雅有賢俠之風且以經
生之術變之法家之用此於何官不可直一
叅軍哉然而叅軍難矣今中外諸衛率勦武
之家寔世之彼其挾汗馬之寵廢敦說之教
狙索弓之樂忘封疆之思蠅營螻選潰不可
振雄庸鷺智元不可居此皆不著於法故也

定故並建明習之士以察其師旅之闕異器
而處則調之難鈞柄而行則攝之難藉非其
人而在此位不以水濟水則以水投石不可
機也豈可食哉是故必有厚累之行潔修之
志如君者可也我國家初序四途以明一德
敦其績用並有可觀自榮名侈於薦紳故異
能沉於刀筆嘉隆之間稍一破例循良之聲
輒復蒸然然則人豈以繇而判才豈以用而

生乎蚤晚不同理而棄取之道殊也方今睹
邊計者談兵矯齊情者懸象二術之貴自此
始矣豈一參軍可以槩君之業哉夫士之不
朽才情流焉人之有靈山川贊焉崆峒之高
江澤之深虔州之雄梅林之沃宜有起者君
將當之矣

送陳獄宰遷樂清縣簿序

大司寇華陽徐心堂趙少司寇方麓王三公

皆明恕簡肅一時君子相繼在此位也諸郎
曹凜凜奉意猶慮十一無當而君爲之李獄
甫二載卽徙樂清簿夫獄苛官也刑嚴部也
簿劇職也樂繁區也由此之彼兩仕並殷君
年且少也何以得此哉家庭之訓修而漸摩
之道善也君於吾漳爲著姓君父嘗爲新會
簿有美績兄弟五人或學明經或治刑名而
蒸蒸然並列士林而君也挺其中幼而書長

而律所謂少年而老吏者也且夫獄之政也
所以象赫曜之威導幽鬱之情順之則陰陽
軌閭澤流反之則災祥興廢譴滋故古之聖
王慎之爲其通於天通微闢於治理鉅也君
王稽留得聞摯令幽人若旁坐而料碁也平
頗之形若前立而對鏡也師使之長一邑佐
一郡吾知其有偶吏而無側民也若以堂論
之餘匡令君之闕出案獄之智試弊訟之能

辟之探囊何所不得樂雖艱也豈所却乎漢
制儒吏並貴故其時循良特盛明興有四途
之格故諸法家令相向而趣成弘以復何寥
寥哉輕重之勢懸修毀之效著也君之此行
覺報平而公選復矣念優異之寵希違昔之
踪乘英盛之年樹卓犖之業遠之追郭何近
之濟萬况播之海隅垂之簡上以示來茲不
亦寶乎君乎勉之母負二三公之舉

贈壽縣令馬君序

代

太史公作循吏傳所稱孫叔敖子產公儀休
輩僅數人其言曰法令所以導民也刑罰所
以禁奸也文武不備良民懼然身修者官未
嘗亂也奉職循理亦可以爲治何必威嚴哉
旨哉言乎吏之藥也夫吏以爲民也豈其以
威嚴臨民使民畏之之謂乎一行先民民從
其欲一事便民民懷其施不然法日煩民日

玩刑日迫民日疎無爲貴吏矣是故公儀休
在魯辭客魚拔園葵逐績婦無所變更而百
官自正子產爲鄭一年而僮子不犁畔五年
而士無尺籍喪期不令而治孫叔敖於楚止
重幣三日而亂市平立高榭半歲而庫車易
不教而民化此三子者利及其民名歸其君
聲施於後世何嘗以威嚴得之其所自奉者
約而其奉民者奢也今馬侯爲壽令有冰簟

之介有風雷之敏一教一令與民宜之民所
最便莫若條鞭之法然往往格而不行者吏
病之也俟獨慨然爲民行之此非肫肫有子
民之心何以然耶是故一下車而百廢舉不
數月而誦聲作昔所稱循吏若孫叔敖諸人
何以加焉夫吏之與民親者莫若守令而令
之親民視守猶切親民切則歷事精歷事精
則當官達故昔人嘗以守令以相而今制諫

官嘗取之令甚哉令不易也漢世稱多賢令
然而若魯卓之輩亦可數計明興二百餘年
無論壽之令鮮若而人卽求之千百列縣亦
不可濫得此何故哉頗於刑憲壹於威嚴而
不著於爲吏之說也壽與余阿隣故並爲齊
地民風大氏相似猶有周太公之遺教焉夫
昔者太公治齊而齊強豈威嚴所奮哉蓋其
尊賢尚功之意使之也卽其後世若威公赫

赫爲伯者長亦以管仲父能作內政以休養
其民故然然則吏道所尚此不亦可以觀乎
而侯之爲壽寔得之今天下當否多所可論
侯旣明於爲令其於以拾遺補闕異日者可
知已余聞侯堅直廉正無所阿避而令子某
早以明經擢制科其在諫垣又以危言顯卽
侯所以褫身式子如是是何官不可哉壽之
人士某等樂侯之政歌侯之德不遠千里以

告於余語曰河潤百里喻德茂者澤博也侯
澤在壽而波及於阿雖微告者余固知之是
故爲侯述之以傳太史公循吏之傳

送龔文學還閩壽母序

代

明天子鴻圖紀萬乾曆乘五五之期太孺人
鶴算標千坤爻呈六六之數星開少府映菽
節以騰祥月轉孟陬協蘭辰而介祉於時仲
子志勤躡屨載揚適越之旌心動倚閭遂命

還叩之駕顧縫衣其乃爾念設悅之謂何歲
序驚魂別候長憐楊柳色鄉關回首歸途乍
怯鷓鴣聲爾其五月朱明一天綠暗林花簌
簌聽鶯語以漸稀江草萋萋送馬蹄而更遠
瞻彼陟岵飛雲結遊子之懷悵此分溝流水
引離人之思某也十年爲客猶未逢人幾度
上書空慚于主迎輿自苦憶負米於仲由捧
檄誰歡感遺羹於考叔矧乃誼同桑梓情比

頃篋千里聯床對雨譚風疑是夢一朝分袂
卷山臨水送將歸他鄉故鄉嘆飄飄似雲之
散若母吾母願皎皎如月之恒是以仰淑德
而咏雞鳴慕慈儀而誦麟趾恭裁四韻遙致
一觴絳雪難餐曷佐西池之宴白華可和聊
獻北堂之歌

壽沈翁序

箕山之陰雒水之陽朱雀之野白馬之鄉土

游沛其潤中嶽發其光異物之所出至人之
所藏是故秦之喋喋誼之曄曄崇之豪孟之
俠並馳號乎當年長蜚聲於來葉况夫我明
鬱焉以興帝澤彌周闕皇風披漢陵朝英星
爛國老雲蒸晉林未可擬隋流何足擬乃有
一叟黃眉皓首避世金門游神玉斗吸八璫
之精吐五華之潏智若愚仁而壽豈方朔之
爲徒將安期之與友邇其年當賜杖日在懸

孤主人徵會客子獻圖於是倚崑崙之丘開
蓬萊之洞擁繡紱之麟環丹冠之鳳流海山
之千螺列洞庭之百甕集簪履之嘉客奏灑
離之雅弄於是南山氏觴而左曰將宇
紫霞自仙叟乎叟乎厥生惟太北山氏觴而
右曰瓊室無塵玉笈不磷叟乎叟乎厥籙惟
人中山氏觴而前曰導彼白源漑此玄根叟
乎叟乎天人之閑於是擊壺而歌之歌

山融融雨露多芬芬桃李被婀娜北山峻峻
斧斤少蒼蒼松柏曼窈窕惟有中山最氤氲
大椿矯矯干青雲春復秋八千歲歲歲華堂
今日會於是子丹進饌上玄奉漿黃童授簡
玉女傳鄉歌皓齒之少妙舞彩衣之郎當日
初長夜未央朗南極之出井映北斗於橫梁

壽汪將軍序

君年三十而學從軍五十而致六十而遊今

茲耄矣可以壽乎夫天之壽人也豈以逸之
用其人也人之貴壽也豈以縱之用其壽也
故古者豪傑之士或篤於誼或勤於功思立
尺寸無媿所終修短不齊所用同耳君於漳
海益著姓也旣厭博士業而談兵說劍求敵
萬人壯哉五子訓以韜鈴遭時不靜島夷內
張聚族教戰捐家保鄉其誼在里人甚厚俠
聲旣宣乃被徵辟從帥治師所向無敵初出

閩中則有走馬街之凱繼大江左則有三坂
沙之捷殲碓洋之衆救湖渡之危蓋散金募
士殺賊擒王父子戮力十有餘載其功在主
帥甚多當其名達制府褒以冠裳賞延二子
爲千夫長孰不謂厚施而薄報多借而少償
也令其蒙擢拔握樞權究此方略試之南北
則縻縻之績投筆之名其所至何止此耶昔
于公治獄平恕後人以昌維天賞善其意甚

長君之排難全活不少卽諸子姓振振而起
亦其常也豈以其身而不宜永康哉故天也
壽君而君則能朋其壽者也

壽蘭丞某孺人序

蘭丞君進有百里之譽退有十畝之賦出有
四方之交入有二子之娛位不充才行且卓
俗此固大父母之訓哉然亦孺人氏之力也
蓋孺人出士族明女則共而勤從而有禮慈

而能教儉而可循焯焯乎美而該哉是以夫
不辱官子不媿儒家日起而上下寧之此懿
之明符也且鄉者君嘗以郡曹視州事忽
而被譴忽而解忽而就遷忽而歸奉身抗志
何朗爽哉所以周旋而風贊之者斷斷乎畫
自內也此嫖修之特節也夫王臨之后佐之
夫行之婦扶之天之道而天下之達誼也緩
急之頃去就之際俠士之所徇而智夫之所

不奮也是以雅詠太姒傳述冀缺介母俱晦
梁妻並誓千里而一睹是結隣而處也百年
而一致是接躅而至也賢哉孺人蘭丞君之
匹哉吾諸舅弟稱有辭矣辭曰婉婉厥章宜
嬉宜康肅肅厥儀宜耆宜頤有酒如澍有肉
如陵願我孺人如月之恒

建德尉黃君六十壽序

六十曰耆可以爲卿矣何也耆指使也卿指

使人者也且耆之爲言耆者耆知草也耆則知如耆故可以指使人可以爲卿然則非卿不爲耆乎不然也上事貴人下達細民尉地最濃而欲上下如耆而尉如卿使民懷而貴人重不亦難乎君以廉且能明乎上下之道而立久遠之名望民懷之貴人重之且爲之指使而不勞雖尉也可以耆矣何也耆壽也壽久也至久莫如名名無窮達無尊卑貧富

與天壤俱者也君能指使人乎建德尉之名
凡華讓峙矣豈其卿豈其卿

壽黃翁七十序

蓋翁既七十二三子八九孫及曾仲子行爲
郎餘並有生道不素孟孫習博士業嗜學能
文立可就少者羣相趨翩翩然起矣女二各
適中貴人之子有淑辭諸甥亦岐岐如其外
表每有燕慶則內外少長嬉然環列翁冠帶

委緩晏坐其中矐然其中也此豈不足以壽
哉何以得之耶余聞翁無他狀第平生好勸
人爲善世有勸人爲善而已爲不善者與翁
未嘗以貲雄里中然而施予不倦子姓之貧
而知學者咸資以成名故薦紳先生往往以
其義雅重之由此睹之翁之善孰勸之哉夫
善祥物也人所固有也爲善長生又何怪焉
或曰翁精岐黃之術於人活甚多故天以此

報翁施此亦固然之說乎然而翁能衛人之
生則必能衛其生矣故若翁所謂自壽者也
余何言哉

龐九郎壽序

歲庚辰五月甲子龐九郎之設帨芳辰也客
爲之圖以壽之酌僉獻疑於三夢生日壽人
云者云人壽也願則壽之期則壽之非期非
願壽之何居生日客不聞不朽之說耶夫夫

以砥行蜚聲不朽女婦以明章完順不朽不
朽則壽壽不壽壽否則壽不壽客曰然哉雅
辟殊方褒刺異理不朽之說何以至此生曰
客知乎玉乎含精在璞靈光濯濯琢而文之
器重天廓承列敖房明采皇皇或遺滂溷粹
白不亡今茲九郎抱嫩好而不飾妖冶工言
笑而不涉佞俚然或對客移時不出一語憂
怨之色黯然動人此何以故哉其幽思長想

不願與二三女郎俱沒沒也昔蜀姝得高氏
顯楚妓以秦卿傳令二公名終天壤則二女
者當與之俱容久矣今之九郎玉而有文藉
令得高氏遭秦卿安知其不爲蜀姝楚妓耶
是其不朽者猶在也何可以不爲之壽於是
客各自浮盡酌而壽九郎

斷腸辭序

夫所以戀生忘死棄故取新賣君友嫁怨讐

枳首岐舌醜然人世者無情故也夫情人所
生也男女之際情所起也予觀斷腸辭攸攸
乎思深哉野而信惻而有懷置之中谷有雜
氓之蚩蚩諸篇中風何淳也嗟夫悲莫悲兮
生別離樂莫樂兮新相知此兩語屈子所以
入江也余每歌之則浪浪霑襟讀斷腸辭而
無感焉者是無瞽氏之民也

福清岱丘厦廳林氏重修族譜序

大都物必有所自始崑崙之山羣望之祖也
黃河之水衆流之宗也矧伊人矣其孰無宗
與祖乎是故先王爲祖宗功德之不可無報
也則制之宗廟之禮以通其情爲族氏本支
之不可或遺也則制之譜圖之法以紀其傳
信以傳信疑以傳疑要使夫爲子若孫者有
所徵考因是以不忘所自而得盡乎情與禮
耳後世浸失此意皆欲繫籍乎聖賢物色乎

盲聾雖世遠人亡非我族類者亦將牽援而
附益之於是乎紀載繁蕪正傳乖舛君子蓋
無取焉余也其亦有是乎哉嘗攻學山公遺
一章少山公所親受也傳誦數世宜齋公
始繹之而序以成譜據事直書可謂信矣歷
嘉清公方八世爰有六子曰玉曰珏曰量曰
珪曰晚望再望是也量公以洪武九年丙辰
入伍於南京留守衛逮宣德三年戊申始復

伍於萬安所再望公以洪武十九年丙寅登
賢於太湖之下溪陳氏因而家焉惟玉與珪
珪與晚望四公流爲四派始學山而至余凡
十五世矣嘉靖乙酉春錫公念其傳之已久
獨毅然爲之刪述世系宗支宛然可陳其間
簪纓文學忠義孝友淳龐清素敦尚古雅者
代不乏人祖宗之家法固亦庶乎其無敢慢
也嗣是倭夷猖獗子姓參商十餘年亂無寧

日是譜已爲煨燼矣賴有十六世孫曰懋者
獨全一帙巔末備載蓋錫公重脩時所自錄
也懋性仁孝志不忘本越隆慶二年春王正
月朔登拜家廟禮畢而燕旣醉迺起而言曰
古之飲食者雖菜羹必祭重其始也吾今日
所以得羣昭穆而聚樂于斯者伊誰之賜乎
而可無以崇其報也自吾祖學山公以來其
發祥不爲不遠矣其世德不爲不多矣舊譜

雖火於兵然而猶幸有存者吾諸伯兄其能
無意乎哉因出之以示僉曰吁信矣哉吾之
譜也偉矣哉子之功也後之窺崑崙遡黃河
昭先王之教而免于君子之譏者將終賴焉
遂訂正之五日告成命余序之於此云時隆
慶二年歲在戊辰春王正月五日十五世孫
章百拜序